

# INUIT ATAQATIGIIT

## Inatsisartuni



UKA 2019/pkt. 153  
1. oktober 2019  
Aqqa Samuelsen

**Inatsisartut aalajangiiffigisassaattut siunnersuut Naalackersuisut peqquneqarnissaat pillugu sulissutigeqqullugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (Immikkoortut A-miit D-mut)**

(Inuussutissarsiornermut Nukissiuuteqarnermut Ilisimatusarnermullu Naalackersuisoq).

Inatsisartut aalajangiiffigisassaattut siunnersuut Naalackersuisut peqquneqarnissaat pillugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik Inuit Ataqatigiit imatut oqaaseqaateqassapput:

Siullermik Inatsisartut 2019-imi upernaakkut ataatsimiinneranni imm. 165 siunnersuut saqqummiussarput pillugu partiit amerlanerussuteqarluartut tapersermarsuk aammaarluta qutsavigerusuppagut. Minnerunngitsumillu siunnersuutip malitseqartinnera timitalerniarneranilu Naalackersuisut maannakkut siunnersuummik saqqummiussimmata qutsavigerusullugit.

Qeqertarsuup Tunua Qasigiannugit Aasiaallu akornanni nuna tassaavoq nunatta sineriaanitulli pisuussutsimigut naassaangitsumik piujuartitsinermillu tunngaveqartumik inerisaaffigissallugu takkuitsorneqarsinnaangitsoq piukkunnaateqarluinnartorlu. Pinngortitap pissarititai pingaartumik nukik piujuaannartumik aallavilik atorluarneqartariaqarpoq. Nukissiuutit piujuaannartut mingutsitsinngitsut erngup nukinganik nukissiorfiit nunatsinni naalackersuinikkut pingaartinneqarnerullutillu salliutinneqartariaqarput. Avatangiisinut mingutsitsinngitsunik nukissiuutinik pilersugaanissaq kiisalu uuliamik isumalluuteqarnerup annikillissarnissaanut suliniuteqartoqarnissaanut anguniagaqarnissamut Inuit Ataqatigiit suleqataarusupput.

Nunatta avataaniit orsussamik pisariaqartitsineq nunatta maangamut suli aningaasartuutisaa allangortinneqassappat, aningaasanillu inuiaqatigiit sipaaruteqarnerulissagutta siunissami akilersiunnaanerusunut aningaasaliisariaqarpugut. Qasigiannugit Aasiaallu innuttaasui nunatta ineriartorneranut ilapittuisuuginnaratik aamma ineriartortitsineq malugisariaqarpaat. Qasigiannugit Aasiaallu illoqarfiupput allatuulli ineriartorusuttut inuttussutsimikkullu annertusarusuttut. Erngup nukissiorfissaata sananeratigut Qasigiannugit Aasiaallu aamma nunaqarfiit qanitarisaat ineriartornermut ilaatinneqalissapput inuussutissarsiutitigullu inerisaasoqarnissaanut kajungerneruleritsissalluni.

# INUIT ATAQATIGIIT

## Inatsisartuni



Inuit Ataqatigiinniit maluginiarparput inuiaqatigiit aningaasarsiorneranni kingunerisassai pillugit naatsorsuineq ingerlanneqarsimasoq tunuliaqutaralugu erngup nukinganik nukissiorfimmik Qasigiannuanik aamma Aasiannik pilersuisussamik sanaartornissaq unammilligassaqqartoq aningaasaqarnikkut maanna nalimigut amigartoorfiusussamik. Killormulli inuiaqatigiit aningaasarsiornerannut atatillugu naatsorsuusiornerit ersersillugu Nuummik pilersuineranut erngup nukinganik nukissiorfiup allineqarnissaa inuiaqatigiit aningaasarsiornerannut annertuumik iluanaarutaassasoq. Nuummi erngup nukinganik nukissiorfiup allilerneratigut Qasigiannugit Aasiaallu akornanni erngup nukinganik nukissiorfiliornissamut imminut akilersinnaasuunissaa qulakkeerniarlugu Naalakkersuisut saqqummiussipput. Suliniutit marluk imminnut katinniarneqarnerat paasilluarparput.

Naalakkersuisut Nukissiorfiit siunissaannik aaqqiissutissatut uani qaqitaat nukingerani peqqissaartumillu tunngaveqarluni suliarineqartariaqartut Inuit Ataqatigiit isumaqarput.

Imminut aperisariaqarpugut suniarnerluta – Ilumut Nukissiorfiit A/S-inngorlugi aqussinnaajunnaarlugulusooq inissinniarparput? Inuit Ataqatigiit isummamut tassunga isumaqataangilagut. A/S-inngortitsinermimi suliffeqarfiup inuiaqatigiinnut iluaqutaasumik siunertalimmik ingerlannera, aningaasarsiorluni iluanaaruteqarnissamik siunertalimmik taarserneqarnissaa uagut orniginngivikkatsigu.

Qasigiannugit Aasiaallu erngup nukissiorfittaarnissaanni imminut akilersinnaanngitsutut oqartoqarnera isumaqatiginngilarput. Nunattami avataanut ikummatissamik pisinniaqattaaginnarnikkut aningaasap aniatersaaginnarneraniit, nunatsinni pissarititavut aallaavigalugit nukissiuteqalernikkut aningaasat aniatersaaginnarneraniit iluaqutigilertussaagipput kialluunniit takusinnammagu. Inuit Ataqatigiit Qasigiannugit Aasiaallu akornanni nukissiorfiliassaq isumalluarfigaarput, inuussutissarsiornikkut siuarsaanissamut innuttaasullu piujuaannartitsisumik aallaaveqartumik nukimmik atuinerat aamma nunarsuarmioqataasutut mingutsitsinngitsunik ineriartortitsinissatta siuarsarnissaa pisariaqarmat suleqatigiittariaqarpugut aningaasaliinissamullu piumassuseqarluta. Inuit Ataqatigiit aningaasaliinissap aaqqissuussinernik periarfissat pillugit isummersoqataarusupput peqataarusullutillu, tamanna pillugu Naalakkersuisut siunnersuutaat Ataatsimiititaliamullu susassaqqartumut ingerlateqqillugu.